

Андрей Яковлевич Кремс

Коми Республикаса Юралысьлөн 2024 во моз тöлысь 19 лунся 98 №-а Индöдөн сетöма «Почёта гражданин» Коми Республикаса медвылыс почёт ним (кувсьöм бöрын).

Чужис 1899 вося сора тöлысь 17 лунö Бакусянь неылын Зюд-Остов-Култук местаын (öнi Азербайджан) чери кыйысьлөн семьяын.

Уджалис Азербайджанса прöмысельяс вылын чертитчысьöн, коллекторöн, геологöн, Балаханскöй геологическöй бюройн районса шöр геологöн. Вöли «Азнефть» котырын юралысь геологöн. Сылы сетöма Ленин орден. 1934 воын А.Я. Кремс лоö СССР-са сьöкыд промышленностьын народнöй комиссариатлөн Мусир промышленностьöн медшöр веськöдланінса (Главнефть) юралысь геологöн.

1938 воын, США-ö командировкаö ветлöм бöрын, А.Я. Кремсöс арестуйтисны, мыждисны «троцкистскöй организацияö пырöмысь», шпионажысь да 8 во кежлö пуксьöдисны лагерö. Пукавнысь ыстисны Чибью посёлокö. Уджавны заводитис мусир шахтаын коллекторсянь. 1939 вося кöч тöлысьын примитис ярегаса шахтаысь медводдза мусир.

1940 вося сора тöлысьö А.Я. Кремсöс кадысь водз лэдзисны да индисны Ухтижемстройса (сёрöнджык Ухткомбинатса, УТГУ-са) юралысь геологöн. 34 во чöж А.Я. Кремс юрнуöдис мупытшса озырлун корсян уджъясьöн да наука туялöмъясьöн. Тайö кадас вöли восьтöма комынысь унджык мусир да биару куйлöд, на лыдын шоча паныдасьлысь Рытыввыв-Тэбукскöй да Усинскса мусир куйлöдъяс, Вуктылса биару конденсат куйлöд да мукöд. Тайö аддзöмторъясыс сетисны позянлун лöсьöдны Коми Республикаын мусир да биару перьян да переработайтан гырысь производствояс, Россияса регионъясьö мусир да биару проводъяс.

Андрей Яковлевич зiля пырöдчис карлөн да республикалөн олöмö. Медводдзаяс лыдын вöзйис восьтыны Ухтаын мусир нырвизь серти вылыс тшупöда велöдчанін, да кыдзи наукаса доктор 1967-1969 воясьö удждон босьтöг веськöдліс Ухтаса индустриальнöй институтлөн геология кафедраöн.

А.Я. Кремслысь нимсö пыртöма Коми АССР-лөн Нэмöвöйся Удж Слава Небöгö. Андрей Яковлевич Кремс – Социалистическöй уджвывса Герой, СССР-са канму премияа кыкысь лауреат (1947 во, 1951 во), Ухта карса почёта гражданин, Ухтаын XX нэмся олысь. Геолог нимөн шуöма Ухтаын улича, сылысь нимсö сетöма Ухтаса канму техническöй университетлөн велöдан-геология музейлы.

Кувсис Андрей Яковлевич Кремс 1975 вося ода-кора тöлысь 31 лунö.